

Na osnovu člana 10. stav 1. alineje 1., člana 69. Statuta Općine Stari Grad Sarajevo - Prečišćeni tekst ("Sl. novine Kantona Sarajevo"; br.20/13) i člana 15. Zakona o principima lokalne samouprave u Federaciji Bosne i Hercegovine ("Službene novine Federacije Bosne i Hercegovine", broj: 49/06 i 51/09), Načelnik Općine Stari Grad Sarajevo, donosi:

ODLUKU

o utvrđivanju uslova i postupka za ostvarivanje prava učešća građana za stimulisanje stočarske proizvodnje u okviru Projekta "Razvoj stočarstva" na području Općine Stari Grad

Član 1.

Ovom Odlukom utvrđuju se uslovi i postupak za ostvarivanje prava učešća građana sa područja Općine Stari Grad Sarajevo, u okviru Projekta "Razvoj stočarstva" sa ciljem stimulisanja stočarske proizvodnje.

Član 2.

Pravo na učešće u stimulisanju stočarske proizvodnje imaju fizička lica (u daljem tekstu: poljoprivredni proizvođači) koji ispunjavaju uslove propisane ovom Odlukom.

Član 3.

Uslovi za ostvarivanje prava učešća poljoprivrednih proizvođača su:

Opći uslovi :

1. Da podnosilac zahtjeva ima mjesto prebivališta, zemljište na području Općine Stari Grad;
2. Da je zakonski korisnik zemljišta (vlasnik, suvlasnik, nosilac prava korištenja i slično);
3. Da je poljoprivredna proizvodnja na posjedu gdje podnosilac zahtjeva stanuje;
4. Broj članova domaćinstva poljoprivrednog gazdinstva;
5. Da posjeduje vlastiti objekat u kojem je moguće smještaj stoke (ili ugovor o korištenju).

Posebni uslovi:

1. Da je podnosilac zahtjeva demobilisani borac;
2. Da je podnosilac zahtjeva nezaposlen ili penzioner;
3. Priznat status RVI podnosioca zahtjeva;
4. Porodica šehida;
5. Da je poljoprivreda proizvodnja osnovni izvor egzistencije;
6. Dokaz o boračkom statusu, statusu RVI i statusu civilne žrtve rata člana porodičnog domaćinstva.

(uslove pod tačkom 3. i 5.– Opći uslovi, utvrđuje Komisija za stimulisanje stočarske proizvodnje (u daljem tekstu Komisija) na licu mjesta, koju imenuje Općinski Načelnik. Svaki navedeni uslov bodovaće se prema posebnom aktu koji će utvrditi Komisija.

U slučaju da prijavljeni kandidati pri bodovanju imaju isti broj bodova, prednost će imati onaj kandidat čiji je porodični standard niži.

Član 4.

Uz zahtjev za stimulisanje stočarske proizvodnje potrebno je priložiti dokaze o ispunjavanju općih i posebnih uslova navedenih u članu 3. Odluke. Prijave na Javni poziv podnose se predajom na šalter protokola u zgradi Općine Stari Grad. Zahtjevi podneseni sa nepotpunom dokumentacijom i podneseni mimo utvrđenog roka neće se uzimati u razmatranje.

Član 5.

Postupak za ostvarivanje prava učešća građana za stimulisanje stočarske proizvodnje provodi Komisija. Odluku o dodjeli sredstava za stimulisanje donosi Načelnik Općine Stari Grad Sarajevo na prijedlog Komisije.

Izabrani kandidati potpisuju Ugovor o namjenskom grantu sa Općinskim Načelnikom, kojim će biti regulisana sva dalja međusobna prava i obaveze.

Član 6.

Rok za podnošenje prijave na Javni poziv je 15 dana od dana njegovog objavljivanja na oglasnoj ploči Općine, oglasnim pločama mjesnih zajednica i web stranici Općine Stari Grad. Za realizaciju ove Odluke zadužuje se Služba za privredu.

Član 7.

Ova Odluka će biti istaknuta na oglasnoj ploči i web stranici Općine Stari Grad, stupa na snagu danom donošenja, a objavit će se u " Službenim novinama Kantona Sarajevo".

Broj: _____

Sarajevo, _____ 2015.godine.

NAČELNIK OPĆINE

Mr. Ibrahim Hadžibajrč